

Wednesday, May 14, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

HEALTH MINISTER

Health Minister Pi Lalrinpuui'n RIPANS chu Hmarchhak Nursing zirna changtlung ber a nih thu leh nurse te chu mipui te hriselna enkawlna kawnga pawimawh ber an nih thu a sawi.

He thu hi vawiina Regional Institute of Paramedical and Nursing Sciences (RIPANS) a Final year M.Sc Nursing zirlaiten Nurse te intuaitharna leh than zelna atana duan, Continuing Nursing Education program hawnna inkhawmah a sawi a, Pi Lalrinpuui chuan Nurse te chu mipuite hriselna kawnga dinhmun pawimawh tak chelhtu an ni tih inhre reng turin a chah a. Sawrkar pawhin mipuite hriselna chu a ngaipawimawhin, Mizoram Universal Healthcare-te pawh mi tin huapzo turin a kalpui tan mek tawh tih a sawi a. Hengte hre reng chung hian nurse-te pawh mipuite tana rawngbawltu an nihna chu vawng nung zel turin a chah nghal bawk a ni.

Ni hnih awh tur, he programme-a an thupui chu 'Investing in Nurses, Investing in Health: Empowering the future of healthcare' niin, Nursing zirna in leh Damdawi in hrang hrang atangin, Nursing zirtirtu, Senior Nursing Officers leh Nursing Officers 30 ten ni hnih chung training an nei dawn a. He training program ah hian topic hrang hrang zirtirna nei turin mi thiam bik 5 te sawm an ni.

RIPANS hi Ministry of Health & family Welfare, Govt of India hnuaiah 1996 ah din a ni a. North East state hrang hrang atangin Zirlai 800 chuang awmin, Bachelors programme 5 a awm a, Master programme 3 leh PhD zirna programme 1 a awm mek a. Hei bakah hian Physiotherapy leh Nutrition & dietetics programme hawn belh tura hmalak mek a ni a. Khum 100 awmna damdawiin hawn thuai tum a ni bawk.

Tun thla ni 6 atanga ni 12 inkara INTERNATIONAL NURSES WEEK pual in College of Nursing ,Regional Institute of Paramedical and Nursing sciences, leh Millenium Development Authority tang kawp chuan May ni 9 khan Millenium Centre ah mipui te tan hriselna kawnga inzirtirna te, san zawng leh rih zawng tehna te, Blood pressure leh Zunthlum endikna hun an lo hmang tawh bawk a ni.



OPERATION SINDOOR SOLIDARITY MARCH

BJP Mizoram chuan "OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan vawiin khan Aizawlah kawngzawh an huaihawt.

BJP Mizoram huaihawt kawngzawh hi Aizawl Tresury Square-a War Memorial atanga Vanapa Hall kawt thleng neih a ni a, kawngzawh tan hma in BJP Mizoram President Pu Vanlalthmuaka chuan thu sawiin, vawiina kawng an zawhchhan chu Pakistan sorkarin a thlawp mifirfiakten India ram chhungah pawisawi lo mi engemaw zat Pahalgam ah an thah avanga Prime Minister Narendra Modi-a kaihhruai India sorkarin a thungrulhna atana Operation Sindoor hnuaia Pakistan ah beihpui a thlaknaa tel India sipai huaisen te Mizoram mipui ten an thlawpna lantirna a ni tih a sawi a. India sipaite ral beihna hmunpuiah, tun hunah hian Mizo tlangval huaisen chhuanawm tak tak, Mizoram leh Mizo hnam tihming thatu, zam ngai lo val engmaw zat an awm tih an hriat thu sawiin, Mizoram leh Mizo hnamin an chuang hle a, Mizoram a Kohhran zawng zawng ten an tawngtaipui tih sawiin Prime Minister Pu Naredra Modi kaihhruaina hnuaia Operation Sindoor a hnehna an chan avangin, Prime Minister chu an chhuangin, an thlawp tlat zel dawn tih a sawi bawh a ni.

Kawngzawh hi Aizawl Tresury Square-a War Memorial atanga Vanapa Hall kawt thleng huaihawt a ni a, BJP Mizoram Core Member, Pu. Lalrinliana Sailo chuan thusawiin, Bethlehem Corps Commanding Officer, Maj. Laldawngliana chuan tawngtaina in a khar a, Ex-Servicemen te leh party pawn lam atanga kawngzawh thlawptute he hunah hian an tel a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



MZP

MZP chuan tun hnaia Sericulture Department hnuaia Demonstrator 4 lak dan chhui chian an phut tih an sawi a, sawrkar chu tun thla ni 21 ral hmaa chhui chiang tur committee din turin an ngen tih an sawi.

MZP thuchhuah tarlan danin, Sericulture Department hnuaia Demonstrator post 4 lak chungchangah thil fel hlel tak a awm avangin chhui chian ngei ni se an ti a, hna lak tura kumin April ni 8-9 a Exam-ah mi thenkhat ten Examination Hall-ah mobile phone an keng lut a, entawn an awm ngei ni-a an hriat thu an sawi a. Hnalak dan diklo chu exam beitu zinga thenkhatin sawisel mah se, kaltlang luihpui a ni tih sawiin, he thil dik lo hi chhui chiang vat turin Sericulture Department hotute an ngen a. Tun thla ni 21 ral hma ngeia

hnalak dan chhuichiangtu tur Inquiry Committee din turin Mizoram Sokar an ngen a ni.



DEPUTY SPEAKER

Tukin khan Mizoram Legislative Assembly Deputy Speaker, Pu Lalfamkima chuan Kolasib khawpui, Electric venga Fire station leh PHE compound bul hnaia kangthelh motor ten kawngpui zim leh kaw i ulh lutuk avanga rikrum thil thua tlan chhuah dawn a harsatna an tawh thinna hmun chu a enfiah.

Electric venga Fire Station hi Kolasiba Fire Station awm chhun niin, helai hmun atanga Hmar veng leh veng dang pawh chhohna kawngpui hi a zimin a kual em avangin Kangthelh motor te tan vaw i khata kual chhuah mai theih a ni thin lova. He thil hi hun rei tawh tak atanga Fire Station lam hotute leh a veng chhung mipuite leh a chhehvela sawrkar office te pawn an ngaih pawimawh a ni a. Tukin khan Deputy Speaker hian a hmunah enfiahin harsatna tawh lova kangthelh motor a tlan chhuah theih dan tur Kolasiba sawrkar Department hotute leh khawtlang hruaitu kalkhawmte a sawipui a.

He an ruahmanna ahhian kawngpui awm sa tlem a siam danglam leh Department ram thenkhat lak hek ngai te a awm avangin PWD, PHE, P&E leh Police hotu lian te lamah thlen nise tia sawiho a ni a. Deputy Speaker chuan a rang lama zia k a thlen a hma la tura hrilhin amah ngeiin bawhzui a tum thu a sawi bawh.

